



UKA 2025/11-2

6/11-2025

Karen Marie Kyed Frederiksen

2024-mut Nunatta Karsiata naatsorsuutaasa akuersissutigineqarnissaannik siunnersuut.

(Aningaasaqarnermut Akileraartarnermullu Naalakkersuisoq)

(Aappassaaneerineq)

2024-mut naatsorsuutini, tassungalu isumaliutissiisummik suliaqarnermi annertuumik suliamut aallarniutigalugu Demokraatit qujarusupput. Nunatta karsiata aningaasaqarneranik naatsorsuutit eqqortumik takussutissiipput. Ilutigisaanik inuiaqatigiit aningaasaataannik aqutsinerup suli tatigineqarnissaa qulakkeerniassagatsigu, isornartorsiorneqartut pimoorussisumik tiguneqarnissaat pingaaruteqarpoq.

Kukkunersiuisut nangaassutitaqanngitsumik uppersaallutik atsiorsimasut maluginiarparput. Aningaasanik aqutsineq pingaarnertut pissusissamisut ingerlanerani tamanna ersarilluinnartumik takussutissaavoq. Kisianni aamma suliaasaqarfinnik pitsanngorsarneqartariaqartunik suli peqartoq maluginiarparput. Uani ilaatigut illup iluani nakkutilliinernik, qarasaasiat isumannaatsuunissaannik, allaffissornermilu ingerlatanik aqutsinernik suliaqarnerit pineqarput. Suliaasaqarfiit taakkua nutaajunngillat, taamaattumillu illup iluani suleriaatsinik annertusaaniarluni, ingerlatsivillu akimorlugu assigiissaarnerusumik suleriaaseqarnissaq qulakkeerniarlugu Naalakkersuisut suliniutinik aallartitserersimanerat pitsaavoq.

Naatsorsuutini saqqummiussinermi aqutsilluarnerunissaq, isertuaatsuunerunissarluk pillugit suliaqarsimaneq akuersaarparput. Akissarsialerineri, taarsigassarsiissutinillu aqutsineri systeminik nutaanik atuutsilersitsisimanerup kiisalu naalakkersuisoqarfiit, pisiortorfiillu akornanni naligiissaarisarnerup pitsaanerulersinneqarnissaanik suliaqarnerup takutippaat, ajornartorsiutit sionatigut uparuarneqartut iliuuseqarfigineqartut. Akisussaassuseqarnermik takutitsilluarpoq, ataavartumillu pitsanngorsaarusussusermik takutitsilluni.

Ingerlatsineri nukittuumik kultureqartariaqarnerup ilisimajartuinnarneqarnera Demokraatit naammagisimaarpat. Aningaasat isumatusaartumik atorineqarnissaannut aamma malittarisassat, suleriaatsillu malinneqarnerinut innuttaasut tatiginnillutik inuiaqatigiit, inuiaqatigiupput nukittuumik inissisimasut. Taamaattoqarnissaani politikerit, atorfilittallu ingerlatsinerup pitsaassusissaanut akisussaaffimmik tigusisariaqarput, tamatuminngalu Naalakkersuisut siunnerfilimmik suliaqarnerinut tamakkiisumik tatiginnittariaqarpugut.

Suliaasaqarfiit ukiumit, ukiumut uparuarneqartuartartut suli eqqumaffigissallugit pingaaruteqarpoq. Pingaartumik qarasaasiatigut isumannaatsuutitsinissaq, nakkutilliisarnerlu suli



pitsanngorsaavigineqarsinnaasut. Systemit, suleriaatsillu allanngortissallugit piffissartornarmat paasisinnaavarput, taamaakkaluartorli innuttaasut pillugit paasisutissat aamma inuiaqatigiit aningaasaqarnikkut soqutigisaat pitsaanerpaamik illersorneqarniassammata, suliap annertuumik pingaarnersiorneqarnissaa kaammattuutigalugu.

Kukkunersiui nermut Ataatsimiititaliap suliaa tamat oqartussaaqataaneranni qitiusumik inissisimaqataavoq. Inuiaqatigiit aningaasaataat qanoq aqunneqarnerinik Inatsisartunut, innuttaasunullu ersarissumik takutitsivoq. Taamaattumik ataatsimiititaliap, Nunallu Karsianut kukkunersiuisut misissuinerminni peqqissaarussisimanerat akuersaarumavarput.

Uparuarneqartunut Naalakkersuisut siunnerfilimmik iliuuseqarnissaannut, ingerlatsinermilu aqutsinerup aamma ammanerunissap annertusarneqarnerinik suliap ingerlaannarnissaannut Demokraatit tatiginnipput. Pisortat aningaasaataasa inuiaqatigiinnut iluaqutaasussamik peqqissaartumik, ammasumik, akisussaassusilimmillu aqunneqarnissaasa qulakkeernissaa pillugu suleqatigiilluarnissatsinnut qilanaarpugut.

Taamatut oqaaseqarlunga ataatsimiititaliaq assigalugu BDO nunap karsianik kukkunersiuisussatut toqqarneqassasoq inassutigaarput. Inassutigaarput, 2024-mut Nunatta Karsiata naatsorsuutai akuersissutigineqassasut.